

晦庵先生朱文公文集

五

晦庵先生朱文公文集卷第八

詩

買船至演平拜建康劉公墓下遂入城假館梅山
堂感涕有作

維舟新曆口步上秣陵阡高丘忽嗟峨宿草迷荒烟拜起
淚再滴哀哉不能言驅車旦復東借此虛堂眠念昔堂中
人經營幾何年一旦舍之去千秋不言還露井益清渌風
林更修鮮思公獨不見涕下如奔川感慨西州門愴恨山
陽篇晤嘆日隱樹悲歌月當軒堂堂忠孝心終古諒弗諉
尚與吳門子歸來故山巔

晚雨涼甚偶得小詩諸問遊山之日并請劉平父
作主人二首

幾年不踏仙洲路
夢入青藤古木間
好趁新秋一番雨
晝寒亭下弄潺湲

廬阜歸來祇短筇
解包茶茗粗能供
若須載酒邀賓客
付與屏山七老翁

宿密菴分韻賦詩得衣字

不到仙洲歲月移
携壺特地歛巖扉
已驚素雪清人骨
更喜蒼烟染客衣
新賞不妨頻徙倚
舊題何事獨噓噓
明朝驛騎黃塵裏
莫待迷塗始賦歸

讀子厚步月詩時方聞呂伯恭訃後數日賦此

晚步曲池上
西風吹我裳
仰觀天宇闊
愛此明月光
念我素心人
眇焉天一方
沒者永乖隔
存者爲參商
飄零百歲期
寂寞幽鬢霜
還坐三太息
高林鬱蒼蒼

次子厚秋懷韻

秋風何方來爲我條殘暑庭梧亦何與索索終夜雨冥思
感物變念此離索苦浩蕩信莫量幽紛那得覩丁年舍我
去憔悴故其所廓落濟時心頽然復安取求懷平生友夢
想見眉宇今晨枉秀句爛若朝霞舉去去同采芝高軒坐
凝佇

黎嶺西南水石佳處不減廬阜戲呈子厚

谷深石瘦水潺潺便是楞伽折桂間珍重下邳圯上客一
年幾度到廬山

讀子厚詩卷用其卒章晨起之韻作詩寄之

晝永倦殘暑宵分喜新涼天雞一振翼爛爛曉月光病榻
感虛徐中庭起翱翔懷哉穀城子物外又不忙掩抑琴調

希激烈歌聲長契闊恨清賞佳期未渠央緘詞託歸鳥側
佇何能忘

登廬峰二首

循礧躋危磴披雲得勝遊蓬茅增舊葺竹樹喜新稠夢想
三秋別徘徊十日留餘年端可料此地欲長休
佳友紛來集欣然會宿心風泉陪徙倚雲月共窺臨雅唱
情俱勝微言思獨深茲遊非逸豫邂逅得良箴

蘆峰次韻

澗水流千仞巖姿起萬般扶藜雖有興駐屐諒難安好客
能同趣羣峰肯縱觀蒼茫却無際誰與話愁端

次瑞泉詩韻

興懷來賞趣對景却忘言偶與同遊客行逢幽澗原淺泓

排積腐暗竇溢流渾終待寒泉食無憂水鏡昏

五禽言和王仲衡尚書

提胡蘆沽美酒春風浩蕩吹花柳不用沙頭雙玉瓶鳥歌
蝶舞爲君壽祇今醉是君恩昨日之愁愁殺人

不如歸去孤城越絕三春暮故山只在白雲間望極雲深
不知處不如歸去不如歸千仞岡頭一振衣

泥滑滑泥滑滑秦望雲荒鏡湖闊綠秧刺水水拍堤牙旗
畫舸凌風發使君行樂三江頭泥滑水深君莫憂

脫袴脫袴桑葉陰陰墻下路回頭忽憶舍中妻去年已逐
它人去舊袴脫了却不辭新袴知教阿誰做

麥熟吟去年種麥有德音祇今種熟誰快活種者已卧官
墻陰仁公有政惠存歿肯使催租更隳突

酬黃子厚見訪歸途惠詩韻

櫪驥倦千里籠鶴思九臯念昔田舍日不知山林高一朝
逢世紛故丘得潛逃平生棲遁志茲焉始堅牢故人穀城
翁高情北窻陶亦復喜我歸巾車款林巢申旦更離闕中
情重忉忉

游密菴分韻賦詩得清字

誤落塵中歲序驚歸來猶幸此身輕便將舊友尋山去更
喜新詩取意成暖翠乍看渾欲滴寒流重聽不勝清箇中
有趣無人會琴罷尊空月四更

游密菴得空字

欲覓仙洲路須乘萬里風飲泉雲出岫卧嶺月流空永夜
渾無寐悲歌莫與同起來殘樹影清絕小樓東

昨爲許進之書胎仙字因以名其室或疑欠舞字者故作此以解之

寒山寒月冷颼颼隻影孤桐萬里遊帝樂夢回三疊遠胎仙舞罷一簾秋未愁悄寂無人會只恐踟躕不自休却笑蕊珠何處所兩忘蝴蝶與莊周

正月五日欲用斜川故事結客載酒過伯休新居風雨不果二月五日始克踐約坐間以陶公卒章二十字分韻熹得中字賦呈諸同遊者

玄景彫暮節青陽變暄風忽尋斜川句感此勝日逢駕言當出遊一寫浩蕩曾雲物疑異候淒迷久連空今朝復何朝頓覺芳景融疇曩庶復踐隣曲歡來同伊雅一籃輿連翩數枝筇綠野生遠思清川照衰容遙瞻西山足突兀彌

畝宮庭宇豁清曠林園鬱青葱於焉一逍遙芳樽間鳴桐
旣爵日樹隱班荆汀草豐纖鱗動微波新萋冠幽叢惆悵
景易晏徘徊思無窮願書今日懷遠寄柴桑翁仰止固窮
節愧茲百年中

次呂季克東堂九詠

野塘小隱

傳得希夷九卦圖歸來不復夢榮途野塘竟日無人到讀
盡床頭種樹書

敬義堂

高臺巨榜意何如住此知非小丈夫浩氣擴充無內外肯
誇心月夜同孤

方拙寮

一室歸來萬事新
窓間橫竹掛朝紳
九流未讓園機士
四海寧慙巧宦人

吟哦室

蒲團竹几睡曹騰
客問君今幾折肱
身世兩忘無可答
起尋詩句遶階行

愛蓮

聞道移根玉井旁
開花十丈是尋常
月明露冷無人見
獨爲先生引興長

月臺

臺上無人伴苦吟
歸鴉過盡日西沉
須臾玉匣開塵鏡
却有孤光共此心

菜畦

雨餘菜甲翠光勻
把菊成畦亦自春
骨相定知非食肉
可能長伴箇中人

海棠屏

蜀樹成行翠作圍
花開時節更芳菲
主人夢亦尋春去
栩栩深穿錦障飛

摘堤

君家池上幾時栽
千樹玲瓏亦富哉
荷盡菊殘秋欲老
一年佳處眼中來

挽吳給事三首

臺省傾群望江湖去一麾
語聞三諫切政有百年思
不盡雲龍會還尋霧豹期
誰知七休詠翻入八哀詩

粵自辭神武超然絕世紛
前身疏太傅今日范忠文
圃樹

寒留月湖波冷浸雲懸知千載下此地想遺芬

憶昔觀風寄登堂識老成忘年見交態把酒話詩情別去如三歲書來忽九京却思憑檻語忍遽勒公銘

伏讀雲臺壁間秘閣郎中盤谷傳丈題詩蒞及賤名追懷曩昔不勝感涕輒次元韻呈諸同遊計亦同此歎也

提携當日忝忘年曾向暇丘獨請前喜看玄雲生素壁恍疑後學廁先賢公遊汗漫今何許我病摧頽久自憐只有空山無歲月倚天寒木但蒼然

是日景仁景初二兄行規卜宅亦宿山間謹并錄呈

尤劇悲愴耳

次韻寄題萬頃寒光奉呈休齋先生

閑將歲月老煙汀更遣詩情到杳冥遊子故應悲舊國壯

懷那肯泣新亭一官避世今頭白萬卷收功久汗青但見
潮生與潮落不知沉醉又還醒

烹伏蒙休齋先生惠詩見留謹次高韻二首

忽驚蕭颯鬢毛秋起向泉山覓舊遊盤谷門前浹沾臆雲
臺溪上雪蒙頭歸歟吾黨又千里老矣心期但一立珍重
休齋書滿屋可無三宿爲君留

望望西山日幾回更憐一雨洗浮埃遠遊莫說雲門寺往
事聊尋單父臺雞犬蕭疎迷洞口交親零落半巖隈尊前
見在君須鬪速上籃輿相逐來

用林擇之韻別陳休齋

別離不覺歲時侵兩地相望共此心今日還成一尊酒它
年應記百篇吟傷情後會無期定握手交情有舊深多謝

晚風知此意不催寒日下疎林

奉酬九日東峰道人溥公見贈之作

幾年回首夢雲關此日重來兩鬢斑點檢梁間新歲月招
呼臺上舊溪山三生漫說終無據萬法由來本自閑一笑
支郎又相惱新詩不落語言間

和林擇之鳳凰山韻

木落髻鬟擁湖平粧鏡空荒亡餘舊事慘澹只悲風興發
千山裏詩成一笑中諸君莫惆悵吾道固當窮

次林擇之涼峰韻

解纜林間寺歸鴉晚欲盤望中嵐翠合愁外夕陽殘尊酒
何妨盡羈心且自寬無端滿窓月遙夜不勝寒

熹去溫陵二十七年而復來顯菴益老見候七里

亭又以佳句見招而休齋陳丈寺丞黃丈皆屬和
焉因次韻奉酬併呈二丈

不因辭吏役那得解天刑故國重來遠寒山依舊青興懷
感陳迹舉目愴新亭尚喜灣頭老禪房許扣扃

答黃叔張

日君趨玉陛抗疏肅邦刑便有榮褒袞無勞涕伏青衆流
爭靡靡一柱獨亭亭只恐追鋒急那容晝揜扃

次韻陳休齋蓮華峰之作

八石天開勢絕攀筭來未似此心頑已吞繚白紫青外依
舊箇中雲夢寬

次黃叔張宿涼峰韻

菡萏含跼天外秀婆娑散影月中孤惜無畫手追前輩寫

就涼峰憇寂圖

至鳳凰山再作

門前寒水青銅闕
林外晴峰紫帽孤
記得南垞通柳浪
依稀全是輞川圖

見梅用攀字韻

年來羞把玉梅攀
萬樹爭春我獨頑
只有顛狂無告訴
詩腸欲斷酒腸寬

次韻陳休齋懷古堂

平昔塵編裏
心期本自幽
那堪舊泉石
更作此追遊
好句看猶在
遺忠愴已休
亦知今日意
不逐大江流

寄題九日山廓然亭

昨遊九日山
散髮巖上石
仰看天宇近
俯歎塵境窄
歸來

今幾時夢想掛蒼壁聞公結茅地恍復記疇昔年隨流水
逝事與浮雲失了知廓然處初不從外得遙憐植杖翁鶴
骨雙眼碧求歡月明中秋風桂花白

用林擇之韻呈陳福公

昔公秉鈞衡金玉我王度中年幾湖海偃息安國步歸然
九鼎重翻若孤雲去俯仰天地間誰哉此同趣

用前韻答方直甫

小儒談大方任意略權度未行要疾走踉蹌不成步唯應
過量人不作與麼去請君敝書帷爲我說歸趣

用前韻答林史君

十年劇傾馳此日際風度胡然龔黃最未接夔龍步詩成
肯遽休客醉那得去却恐驛書來湖山適成趣